

REGIONAL NEWS

HEADLINES:-

1. Larsap-in MLA ni lai leh CADC CEM Pu Rasik Mohan Chakma eiru a puhna thubuai, court a ngaihtuah phalna a pe.
2. Kumin thla riat kalta chung khan Mizoramah ngawr natna avangin enkawl lai mek mi 95 an thi.
3. Sinlung Hills Council inthlan hun tur chu tunkar Ningani hian puan a ni dawn.
4. Prime Minister Narendra Modi-a'n Make in India hnuaiah India chu thil siamchhuahna hmunpui a ni chho mek tih a sawi.

<><><>

RM CHAKMA

Mizoram larsap Hari Babu Kambhampati chuan eiruk thila MLA leh Chakma Autonomous District Council (CADC)-a CEM ni lai Pu Rasik Mohan Chakma puhna-ah court-a a thubuai kalpui phalna (prosecution sanction) a pe.

District Council & Minority Affairs department secretary chuan Pu RM Chakma laka prosecution sanction phalna hi ni 20 khan larsap aiawhin a tichhuak a. He eiruk thubuai intanna hi Pu RM Chakma in bul, Kamalanagar-3 a tuihawk luankawr siam chungchangah a ni a. A chhuitute'n an chhui dan leh finfiahna an neihte uluk taka a zir chian hnu-ah larsap chuan Prevention of Corruption Act, 1988 section 19-na leh Cr.PC, 1973 section 197 tlawhchhanin prosecution sanction hi a pe ta a. Heti hian Pu RM Chakma hi Prevention of Corruption Act, 1988 section 13(1)(a) and 13(1)(b) leh Section 13(2) bakah Indian Penal Code section 409 leh 34-na tlawhchhanin court-a a chungthu rel a nih theihna atan a lakah chargesheet thehluh theih a ni dawn ta a. A lakah hian nikum July thla khan Anti Corruption Bureau (ACB) chuan thubuai ziak lutin an lo chhui tawh a ni.

<><><>

MIZO GUV

Larsap Dr. Hari Babu Kambhampati a theih loh chhunga a ai lo awl lailawk tura ruat Tripura larsap Indra Sena Reddy Nallu chu naktuk hian thutiam tira lakluh a ni dawn.

Protocol & hospitality wing atanga thudawn danin Gauhati High Court Judge justice Nelson Sailo in Indra Sena Reddy Nallu hi Raj Bhavan-ah thutiam tirin naktuk chawhma dar 10 ah Mizoram larsap lailawk atan a lalut dawn a , Rashtrapati Bhavan atanga Press Communique hmanga hriatttirna Ningani a tihchhuahah President Pi Droupadi Murmu chuan Mizoram Larsap Dr Hari Babu Kambhampati-a'n chawlh a lak chhunga lo thawk lailawk turin Tripura Larsap ni lai a ruat a ni. Indra Sena Reddy Nallu hi vawiin tlai khan Lengpui thlawhna tumhmunah a lo tum a, hetah hian chief minister Pu Lalduhoma leh minister dang thenkhat bakah chief secretary, DGP, Assam Rifles DIG leh official pawimawhte'n an lo hmuak a ni.

Larsap Dr Hari Babu Kambhampati chu a khawsik a reh hleih theih loh avangin September ni 7 khan Trinity Hospital-ah a lut a, a that theih mai loh avangin tun thla vek ni 9 khan Hyderabad-a Star Hospital ah dahluh a ni a. Doctor ten a hriselna dinhmun an enfiah hnuah chuap lamah harsatna a nei tih hmuhchhuah a ni a, tunah hian enkawl mek a ni.

<><><>

TB

Kumin thla riat kalta (January leh August thla inkar) chhung khan Mizoramah ngawr natna avanga enkawl lai mek mi 95 an thi.

State tuberculosis programme hotute hnen atanga thu dawn danin hemi hun chhung hian ngawr natna vei a inringhlel mi 15,907 endik atangin mi 1,628 chuan ngawr natna an vei tih hmuhchhuah a ni a. An zingah hian TB natna damdawi a hun taka ei that loh avanga vei thin multi-drug resistance TB an tih mai mi 92 an awm thar a. Mi 95 in an thihpui chungin ngawr natna vei damlo zinga za zela 80 chu tihdam an nih thu TB programme hotute chuan an sawi. HIV/AIDS vei lai tam takin an thih phah chu ngawr natna an kai tel hi a ni a. Ngawr natna vei zinga mi 176 hi HIV hri kai an ni tih hmuhchhuah a ni.

State TB Officer Dr. Febiola Kharkongor chuan sub centre a TB damdawi dah lailawk thin a mumal lohna chhan ber chu central atanga TB damdawi rawn thleng a khaih lak nasa vang a ni a ti a. Chu bakah sub centre ah damdawi dah thatna mumal a awm loh thu te, ngawr damdawi pangngai tak dah khawl thei tur chuan sub centre thuam that leh boruak lum leh vawh zawng dik tak hnuaiah dah a ngaih thu sawiin he ta tan hian sawrkar chuan hma a la chho dawn a ni a ti. TB umbo na kawnga hmalak mek na-ah hnathawhna hmun hrang hrangah (work place) ngawr natna vei leh vei lo endikna kalpui a nih tur thu te, PHC leh CHC zawng zawngah TB endikna tha zawk TrueNAT awm thei tura hmalak a ngaih thute a tarlang bawk.

<><><>

MIM KUT

Naktuk hian Mizoram pumah Mim Kut hman a ni dawn a, a hmanna pui ber chu chawhma dar 11-ah Aizawl a, Vanapa Hall-ah tan a ni ang.

Vanapa Hall-a kut hman tur hi Social Welfare, Tribal Affairs, Women & Child Development department buatsaih tur a ni a. He department changtu minister Pi Lalrinpui'n a hmanpui ang a, Central YMA, MUP leh MHIP hruaitute bakah MKHC hruaitute pawh an tel ang. Mizo Hnam lam leh zaite entira ngaihthlak a ni dawn a ni. Aizawl khawpui chhunga Sawrkar hnathawkte chu Controlling Officer-te remtihna la hmasain Mim Kût hmanna a an tel Sawrkar chuan a phalsak a ni. Mim Kut hmanna pual hian Mizote hnam ziarang leh nunphungte entira a chawilar na'n Mizoram sawrkar hnuaia thawk zawng zawng leh State sawrkar hnuaia Public Sector Undertaking, Board, Body leh Agency hrang hrangte chu naktuk hian Office hun chhunga Mizo thuam inbel turin General Administration Department (GAD) chuan a ngen a ni.

<><><>

ENTITLEMENT

Mizoram sorkarin sorkar sum renchemna atana tih leh tih loh tur a kalpui mek zingah tunhma a an pisa a television set kawl thei official tam tak chu a phalsak tawh dawn lo.

Tun hnai a sorkar hriattirna chhuahin a sawi danin sorkar hnathawk zingah chief secretary tih loh chu an pisa a tv kawl phalsak an ni tawh lova. Kawl phalsak thin - Principal secretary, commissioner, secretary, special secretary, additional secretary, joint secretary leh an tlukpuite chu kawl phalsak an ni tawh dawn lo. Hetih lai hian alo kawl tawh sate chu chhuhsak kher an ni dawn lova, amaherawh chu, tun September thla atang hian thlatin a tv channel an pawhna man leh an tv chhia siamthatna man senso chu sorkarin a peksak tawh dawn lova, a kawltu officer-in a chawi a ngai tawh dawn a ni.

<><><>

DRUG SEIZURE

Mizoram Police ten Zirtawpni zan khan Vairengte Police check gate-ah methamphetamine kg 35 (mum nuai thum leh sing nga) an man.

Police department thuchhuahin a sawi danin autorickshaw driver pahnih Lalhmangaihzuala (kum 40) leh Lalfakzuala (kum 24) Vairengte Vengthar a cheng ve vete autorickshaw 2 an dapna-ah methamphetamine hi hmuchhuakin an man a. An ruihhlo man hi cheng vaibelchhe 4 leh nuai 45 hu a ni. Hetih lai hian Excise & Narcotics department hnathawkte hroin gram 900 New Champhai leh Aizawl khawpui a hmun 2-ah an man bawk a. Heroin kaihhnawihah hian hmeichhe pakhat tiamin mi 4 an man a. ITI veng ami hmeichhia hnen atanga an man hi gram 141 a ni a, Champhai lam atanga chawhmeh kara thuhruk rawn thawn thlak ni a thudawn a ni.

<><><>

SHC POLLS

Sinlung Hills Council inthlan hun tur, tunkar Ningani hian State Election Commissioner Pu H. Lalthlangliana'n a pisa-ah a puang dawn.

Pu H. Lalthlangliana hian Ningani chhun dar 12-ah chanchinbumite Sinlung Hills Council inthlan chungchangah a kawm duh thu hriattirna a chhuah tawh a. Hetah hian member 12 awmna Sinlung Hills Council inthlan hun tur hi a puang dawn niin Akashvani Aizawl chuan thu a dawng a. Inthlan hun hi November thla bul lam a nih rin a ni. Sinlung Hills Council inthlan hi a vawi hnihna tur niin a hmasa ber chu November ni 5, 2019 khan buatsaih a ni a. Khami tum khan MNF 5, HPC 5 leh independent 2 an tling a. Tun term chung hian thuneihna chelhtu executive council vawi 3 an insiksawi a, tunah hian HPC phel leh lam leh ZPM tangrualin sorkarna an chelh mek a ni.

Sinlung Hills Council inthlan lo awm tur atan hian electoral roll siamthar hna thawh mek a ni a, electoral roll duan thar tur atan September ni 10 khan electoral roll duan chhin tlangzarhin Thawhtanni hian final roll tihchhuah a ni ang. Sinlung Hills Council bial 12 zinga bial 6 hi Aizawl district chungah awm a ni a, Saitual district chungah bial 4 awmin Kolasib district-ah bial 2 a awm bawk.

<><><>

MANN KI BAAT

Prime Minister Narendra Modi-a'n Make in India hnuaiah India chu thil siamchhuahna hmunpui a ni chho mek tih sawiin he beihpui hi mirethei, mi naran leh MSME-ten an hlawkpui hle a ni, a ti.

Akashvani-a Maan Ki Baat hun vawi 114-na, vawiina a hmannaah he thu hi sawiin Make in India chu industry lian atanga sumdawng tenau thlengin an chhawr tangkai a, hei hian ramdanga thil thawnchhuah ti pungin Foreign Direct Investment tih chak an tam phah a ni, a ti.

Thla thar Oct. ni 2-a kum 10 tling tur, Swachh Bharat Mission hlawhtlinna tarlangin Prime Minister chuan bawlhhlawh paih ral mai mai tur hman nawn theih dan tur chu mipui ngaihven ber a ni tawh, a ti a, hei hi a hun puma hemi kawnga hmalatu, Mahatma Gandhi chawimawi let ve theihna a ni, a ti.

All India Radio, Doordarshan leh Prasar Bharati-a thawkte fakawm a tih thu pawh sawiin taima taka an thawh zarah Mann Ki Baat-in he mel lung pawimawh tak hi a thleng a ni, a ti a, he prog. hi ramchhunga tawng chi 22 bakah ramdang tawng 12-in ngaihthlak theih a ni, a ti a, prog. puang chhawng ve tu, TV channel, chanchinbu leh Youtuber-te lawmthu a hrilh bawk.

<><><>